

Na osnovu člana 13. stav 2 alineja deseta Zakona o principima lokalne samouprave u Federaciji Bosne i Hercegovine ( Službene novine FBiH br. 49/06 i 51/09) i člana 21. tačka 12. i člana 138. Statuta Grada Zenica ( Službene novine Grada Zenica br. 5/15) , Gradsko vijeće Grada Zenica na \_\_\_\_ sjednici održanoj \_\_\_\_\_2022.godine, donosi

## ODLUKU

o uspostavljanju prijateljstva i saradnje Grada Zenica / Bosna i Hercegovina i Općine Kušadasi  
/Republika Turska

### Član 1.

Utvrđuje se da između Grada Zenica , Bosna i Hercegovina i Općine Kušadasi, Republika Turska postoji interes za uspostavom prijateljstva i saradnje, posebno u području kulture, turizma, obrazovanja, privrednih aktivnosti, javnih i privatnih investicija te pokretanja razvojnih projekata.

### Član 2.

Ovlašćuje se Gradonačelnik Grada Zenica za potpisivanje Povelje o bratimljenju između Grada Zenica i Općine Kušadasi.

### Član3.

Ova Odluka stupa na snagu danom donošenja.

Broj: 01-  
Zenica,        2022.godine

Predsjedavajući Gradskog vijeća  
Mirza Husetić

Obrazloženje:

**PRAVNI OSNOV:**

Pravni osnov za donošenje ove Odluke predstavljaju odredbe člana 13. Stav 2. alineja deseta Zakona o principima lokalne samouprave u FBiH ( Službene novine FBiH br. 49/06 i 51/09) , člana 21. tačka 12. i člana 138. Statuta Grada Zenica ( Službene novine Grada Zenica br. 5/15) , prema kojima Grad može uspostavljati trajnu prijateljsku saradnju sa lokalnim i regionalnim jedinicama drugih država, a o sadržaju i obliku saradnje odlučuje Gradsko vijeće.

**RAZLOZI:**

Na inicijativu nevladinih organizacija Općine Kušadasi i Grada Zenica, pokrenute su aktivnosti radi bližih odnosa dvije lokalne zajednice.

S obzirom da je riječ o općini koja predstavlja značajan turistički centar na obali Egejskog mora u provinciji Ajdin a koja je po broju stanovnika približna veličini grada Zenica to je ocijenjeno da postoji interes za saradnju posebno u oblastima kulture, obrazovanja, turizma, razvojnih projekata, saradnje nevladinih organizacija, privredne i druge saradnje. Prema raspoloživim informacijama Općina Kušadasi je obavila sve potrebne procedura za potpisivanje Povelje o bratimljenju uključujući odluku Općinskog vijeća i saglasnost Ministarstva.

**OBRAZLOŽENJE PRAVNIH ODREDAKA:**

Odredbom člana 1. utvrđuje se uspostava odnosa prijateljstva i saradnje između Grada Zenica i Općine Kušadasi.

Članom 2. daje se ovlaštenje Gradonačelniku za potpisivanje Povelje o bratimljenju između Grada Zenica i Općine Kušadasi

Članom 3. utvrđeno je stupanje na snagu Odluke

**FINANSIJSKA SREDSTVA :**

Za provođenje ove Odluke nisu potrebna posebna budžetska sredstva, a sredstva za provođenje projekata definisanih Poveljom o bratimljenju će biti planirana kroz tekuće budžetske stavke.

**OBRAZLOŽENJE SKRAĆENOG POSTUPKA:**

Kako se radi o jednostavnom pravnom aktu to nije neophodno provođenje javne rasprave o istom i dostavljanje Odluke u formi Nacrta.

## KUŞADASI



Kuşadası (ostrvo ptica) je značajan turistički centar na obali Egejskog mora u Turskoj. Najvažnija privredna grana općine je turizam.

Grad je smješten u istoimenom zalivu Egejskog mora, a nalazi se nekih 95 km udaljenosti od Izмира.

Šire područje Kuşadasija ima oko 120.000 stanovnika, mada taj broj može porasti i za nekoliko stotina hiljada u špici turističke sezone. U užem dijelu grada živi oko 70.000 stanovnika.

Grad obiluje ne samo raznolikim turističkim i zabavnim sadržajima, nego i bogatim historijskim nalazištima i lokacijama kao što su ostaci koji svjedoče arhitektonska i kulturna dostignuća grčke, bizantijske i mletačke kulture.

Još u ta davna vremena ovaj kraj je bio poznat po živoj trgovačkoj aktivnosti koja se odvijala na obali mora gdje je obnovljena i luka koja je dobila ime *Scala Nuova* ili Nova luka kada je sagrađen i garnizon, a centar grada se premjestio sa zaleđa u priobalje.

U 19. stoljeću je trgovačka aktivnost prilično opala izgradnjom željezničke pruge Izmir-Selçuk-Ajdin koji je zaobišao Kuşadası.

Za vrijeme Turskog rata za nezavisnost, Kuşadası je potpao pod vlast Italije, a potom Grčke, da bi ga turska vojska oslobodila 7. septembra 1922. godine.

Kuşadası u turističkom pogledu ima sreću pa je lociran na putu za svjetski poznati historijski grad Efes izgrađen u 10. stoljeću prije nove ere. Godine 2003 privatizirana je luka koja je dotad bila u državnom vlasništvu nakon čega je uslijedila rekonstrukcija kojom se omogućio prihvrat velikih krizera, simbola modernog turizma ove regije.

U samom središtu grada nalazi se čitav niz kulturno-historijskih spomenika iz različitih razdoblja koji privlače veliki broj turista.

Grad organizira i brojne festivale kao što je Omladinski festival i Festival omladine Fanta (po poznatom gaziranom piću), Festival hortikulture, Festival trešnje (najbolje u Turskoj), a svi ti kulturni događaji okupljaju na hiljade posjetilaca iz Turske i drugih zemalja.

Kad je u pitanju sport, najpoznatiji je nogometni klub Kuşadası koji se takmiči u Regionalnoj amaterskoj ligi Turske.

Kuşadası je vrlo aktivan u saradnji sa inostranstvom uspostavljajući veze sa gradovima raznovrsne političke i demografske konfiguracije.